

**Uunga siunnersuut: Suliffeqarfiit innuttaasunik tapersersortarialinnik suliffissaqartitsisut nalunaarsugaasut pillugit Inatsisartut inatsisaat nr. xx, xx. xxx 2019-imeersoq**

(Inuussutissarsiornermut, Nukissiuuteqarnermut Iisimatusarnermullu Naalakkersuisoq)

**Saqqummiussissut**

(Inuussutissarsiornermut, Nukissiuuteqarnermut Iisimatusarnermullu Naalakkersuisoq)

**Siullermeerneqarnera**

Matumuuna suliffeqarfiit innuttaasunik tapersersortarialinnik suliffissaqartitsisut nalunaarsugaasut pillugit Inatsisartut inatsisissaattut siunnersuut Naalakkersuisut sinnerlugit saqqummiutissavara.

Siunnersuummut Naalakkersuisut takorluugaat tassaavoq siunissami inuiaqatigiinnut tunngasutut tamaviaarfissat sunniuteqarluartumik sianiginnittumillu innuttaasunut inuiaqatigiinnullu iluaqutaasussamik suliffeqarfinit innuttaasunik tapersersortarialinnik suliffissaqartitsisunit iluarsivigisinnaagaat. Suliffeqarfiit innuttaasunik tapersersortarialinnik suliffissaqartitsisut tassaapput suliffeqarfiit namminersortuusut, aammalu sulinertik isertitaqarnertillu aqqutigalugit inooqatigiinnermi immikkut ittunik siunertanik siuarsaanissamik siunertaqarlutik inuutissarsiummik ingerlataqartut. Taamaalilluni Kalaallit Nunaat kikkunnut tamanut inissaqartitsisoq pillugu naalakkersuisooqatigiinnissamik isumaqatigiissutip anguniagaata piviusunngortinnissaanut siunnersuut ilapittuuteqassaaq.

Inatsisartut 2019-imi ukiakkut ataatsimiinneranni suliffeqarfiit innuttaasunik tapersersortarialinnik suliffissaqartitsisut nalunaarsugaasut pillugit Inatsisartut inatsisissaattut siunnersuutip Naalakkersuisut saqqummiutissagaat 2018-imi ukiakkut ataatsimiinnerminni Inatsisartut tapersersugaralugu nalunaarutigaat.

Suliffeqarfiit innuttaasunik tapersersortarialinnik suliffissaqartitsisut tassaapput, isumaginninnermi siunertanik angusaqarniarlutik niuernermit ingerlatsisut. Taamaalillutik suliffeqarfiit innuttaasunik tapersersortarialinnik suliffissaqartitsisut inuiaqatigiinni ajornartorsiutinik annertuunik iluarseeqataassapput. Assersuutigalugu suliffeqarfiit innuttaasunik tapersersortarialinnik suliffissaqartitsisut inuit suliffeqarnermi

ajornartorsiortut piukkunnarsarnissaannut akuutinnissaannullu immikkut periarfissaqarfiupput, taamaalillutillu amerlanerusut ataatsimooqatigiinnermut tunniusseqataasinnaannaannut, aammalu amerlanerusut inuiaqatigiinni akuutinneqarnissaannut iluaqutaassallutik.

Siunnersuummi suliffeqarfinnut innuttaasunik tapersersortarialinnik suliffissaqartitsisunut nalunaarsuisarnermut ilusiliaq pilersinneqarpoq, tassani ingerlatseqatigiiffiup ilusai assigiinngitsut apeqqutaatinnagit suliffeqarfiit innuttaasunik tapersersortarialinnik suliffissaqartitsisut tamarmik ilaatinneqarsinnaassallutik.

Inatsisissatut siunnersuummi siunertaavoq suliffeqarfiit innuttaasunik tapersersortarialinnik suliffissaqartitsisut ataatsimoorussamik kinaassuseqarnissaannut tunngavissaliinissaq. Suliffeqarfiit inatsimmi piumasaqaatinik naammassinnittut, suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaanut akuersissuteqarfigineqarsinnaannaat, tamatumani qulakkeerneqarpoq.

Suliffeqarfittut innuttaasunik ikiortarialinnik suliffissaqartitsisutut suliffeqarfiup nalunaarsorneqarnissaanut akuersissuteqarneq, taaguutip »suliffeqarfik innuttaasunik tapersersortarialinnik suliffissaqartitsisutut nalunaarsorsimasoq« atornissaanut kisermaassisussaatitsivoq. Siunnersuutigineqarpoq nalunaarsorneqarnissamut piumasaqaatit tassaassasut, suliffeqarfik isumaginninnermut siunertaqartoq, tassa imaappoq isumaginninnermik, suliffissaqartitsinnermik, peqqissutsimik, avatangiisitigut imaluunniit piorsarsimassutsikkut siunnerfeqartoq, inuussutissarsiummik ingerlataqartoq, pisortanut attuumassuteqanngitsoq, atuunnermini akuutitsisoq aammalu akisussaassuseqartoq aammalu sinneqartoorutiminik isumaginninnikkut iliuuseqarfiginnittartoq.

Sinneqartoorutit atorlugit innuttaasunik ikiuiniarnermik isumaginninnissaq siunnersuut malillugu tassaavoq, suliffeqarfik akileraaruteqareernermini angusaminik suliffeqarfimmini aningaasaleeqqinnermut, suliffeqarfinnut innuttaasunik ikiortarialinnik suliffissaqartitsisutut nalunaarsorsimasunut allanut aningaasaliinnermut imaluunniit tunissuteqarnermut, kattuffinnut tamanut iluaqusiisartunut tunissuteqarnermut imaluunniit aningaasaliisunut pissarsiassanik killilimmik tunniussinnermut, atuissasoq.

Siunnersuutigineqarpoq suliffeqarfiit nalunaarsorsimasut paasissutissanik atuunnerminni ersarissuutitsinissamik qulakkeerisunik nalunaarutiginninnissamut pisussaaffilerneqassasut. Siunnersuutigineqarpoq suliffeqarfinnut innuttaasunik ikiortarialinnik suliffissaqartitsisutut nalunaarsorsimasunut taaguutip atornissaanut kisermaassisussaatitaaneq unioqqutinneqarpat, kiisalu sinneqartoorutit atorlugit innuttaasunik ikiuiniarnermik isumaginninnginneq, akiliisitsinnermik pineqaatissiivigineqarsinnaassasut. Aalajangersakkat allat unioqqutinneqarnerat, pissutsit piffissamut killissaliussap naleqquttup iluani

iluarsineqarsimangippata, nalunaarsorsimajunnaarsitsinermik malitseqassapput.  
Tamatumani aaqqissuussinerup tatigineqalersinnissaa qulakkeerpeqassaaq.

Atuisartoqarnermut Unammilleqatigiinnermullu Aqutsisoqarfiup Inatsisartut inatsisaat  
malillugu aalajangiinera, siunnersuut malillugu Atuisartut Pisisartullu Maalaarutaannit  
Aalajangiisartunut suliakkiissutigineqarsinnaavoq.

Taamatut oqaaseqarlunga siunnersuut Inatsisartuni kajumittumik suliassanngortippara.